



Inatsisartuni ilaasortaq
Anders Olsen, Siumut
/Maani

**Imerk mingutsitsisarneq pillugu § 37 naapertorlugu apeqquteqaammut
nr. 201-imut akissut**

Brevdato: 13-06-2019
Sagsnr.: 2019-13664
Akt-id: 10915579

Asasara Anders Olsen

Postboks 1614
3900 Nuuk

Inatsisartut suleriaasianni § 37 naapertorlugu imermik mingutsitsisarneq pillugu Naalakkersuisunut apeqquteqaateqarputit. Apeqqutitit uannut akisassanngorlugit innersuunneqarput.

Tlf. (+299) 34 50 00

Fax (+299) 34 54 10

E-mail: pan@nanoq.gl

www.naalakkersuisut.gl

**1. Imeqarfinnik mingutsitsisoqassagualarpat imeqarfinnik saliissutit
imeqarfinni amerlanerpaani pigineqanngitsut,
pilersinneqarniassagualarpata, illoqarfimmut ataatsimut qanoq
akeqassagami?**

Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfimmit paasisutissanik pissarsiniarnermi imatut akissuteqartoqarpoq:

”Missingiummik suliarilluakkamik suliaqartoqassappat, sumiiffinni ulorianartorsiorfiusuni tamani pissutsit misissuiffigineqarnissaat pisariaqarpoq. Ullumikkut imileriviit illutaanni avatangiisinut sinaakkusiussat assigiinnginnerujussuat aammalu illoqarfinni ataasiakkaani erngit akuiagassat pitsaassusiisa assigiinnginnerat tamatumunnga peqqutaavoq. Tamatuma saniatigut sumiiffinni ataasiakkaani mingutsitsisinnaasut nalunaarsorneqarnissaat pisariaqarpoq, tamatumani aamma mingutsitsisinnaasut annertussusii suussusiilu assigiinngissinnaammata.

Nukissiorfiit ilisimatitsipput, Nukissiorfiit maanna imilerissutinik atortorissaartunik misilittagaat, taamaallaat Qaqortumi imilerivimmut ataasiinnarmut killeqartut. Imileriviup taassuma imilerissutillu allineqarnerat piorsarneqarnerallu 30 million koruunit missaannik aningaasartuuteqarfigineqarsimapput. Taakku saniatigut ingerlatsinerneq aningaasartuutit amerlissutaat suli misissuiffigineqartut ilaasussaapput.”

Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfiup oqaaseqaatai tusaatissatut tiguakka. Apeqqummut tassunga allanik oqaaseqaatissaqanngilanga.

2. Sisimiuni imeqarfik saneqqullugu aqqusinniortoqassappat, mingutsitsinnaasussatut Naalakkersuisunit ernummatigineqartut pinaveersimatinneqassappata, taava suunukua kommunemimit pigineqartariaqartut imaluunniit naammassineqartariaqartut? Kissaatigaara Naalakkersuisut namminneq aaqqiissutissanik siunnersuuteqassasut.

Qeqqata Kommunia sanatitsisutut Sisimiut aamma Kangerluarsuk Tulliup akornanni imeqarfimmut killeqarfik aqqusaarlugu aqquserniornissamut avatangiisinut sunniutissanik naliliinermik (ASN) suliaqarpoq. ASN-imut nalunaarummi suliap imermik isumalluuteqarfimmut kiisalu sanatitsisup pinaveersaartitsissutaasussanut, imeqarfiup killeqarfiata iluatigut aqquserniornermi ingerlatsinermilu erngup imigassap pitsaassusianut ulorianartorsiortitsinnginnissamik qulakkeeriviusussanut siunnersuutai nassuiaqqissaarneqarput. Tassalu sanatitsisoq pisussaavoq, aqquserniassatut kissaatigineqartup sunniutissaanik qulaajaassalluni, kiisalu pinaveersaartitsissutaasinnaasunik tikkuaassalluni. Maannakkumut Pinngortitamut Avatangiisinullu Naalakkersuisoqarfiup ASN-imut nassuiaat iluarsisaq sanatitsisumiit utaqqivaa.

3. Nunani allani nunatsinniit biilnik angallaffiunerujussuusuni, imeqarfiit saneqqullugit biilit angallannerat eqqarsaatigissagaanni, sunaanna nunatsinni akuersaarnissamut assigiinnigissutaasoq?

Nunani allani, soorlu Norgemi, pilersuinermut attaveqaatit Kalaallit Nunaannut naleqqiullutik imminnut ataqatigiinnerujussuupput. Taamaattumik sumiiffimmi ataatsimi mingutsitsisoqarpat, imilerivimmit ataatsimiit allamut imermik pissarsisoqarsinnaavoq. Kalaallit Nunaanni imileriviit avinngarusimasumiipput amerlanertigullu tatsinik imeqarfissanik qinerneqarsinnaasunik allanik peqarneq ajorpoq. Taamaattumik tatsit imermik imigassamik imeqarfiit mingutsinneqarnissamut aammalu imileriviit aserortoornissamut sunnertiasorujussuupput. Norgemi tatsinik imermik imigassamik imeqarfinnik, kalaallit tasiinit imeqarfinnit annerungaatsiartunik itinerungaatsiartunillu peqarpoq, tatsillu angisuut taakku mingutsinneqarnissamut sunnertiannginnerupput. Taamatuttaaq nunani allani imilerivinnik annerusunik atortorissaarnerusunillu peqarsinnaavoq.

4. Suumukua anai pineqartut? Inuup imaluunniit qimmit?

Apeqqummut matumunnga tunngatillugu § 37 naapertorlugu apeqquteqaammut nr. 182-imut, mingutsitsiviusinnaasunut assersuutinik arlalinnik allattuiffiusumut akissummut innersuussisoqartoq isumaqarlunga erseqqissaatigisinnaavara, imeqarfiup killeqarfiata iluani angallannerup annertusinerani imeqarfiup killeqarfiata iluani eqqakkat amerlisinnaasut. Eqqakkat timimut tunngasut, soorlu inuit uumasullu anaat tappiorannartunik mingutsitsinermik *kinguneqarsinnaapput.*

5. Ullumikkut Sisimiuni erngup pitsaasusaa qanoq ippa?

2018-imi aamma 2019-imi Sisimiuni imermik misissueqqissaarnermi timimut-kemiimut tappiorannartoqassutsimullu tunngasut erngup imigassap pitsaassusissaanut piumasaqaatit iluanniipput.

6. Imeqarfiit illoqarfinni allani ineriartornissamut ajornartorsiutaalersimappata, taavami Naalackersuisut sunik aaqqissutaasinnaasunik eqqarsaateqarpat?

Naalackersuisuniit imermut imigassamut isumalluuteqarfiit mingutsinneqarnissaannut pinaveersaartitsineq aallunneqarpoq. Ullumikkut imileriviit amerlanersaasa imeq akuiagassaq assersuutigalugu benziinamik uuliamilluunniit, imaluunniit inuit suliaqarnerisa annertusineranni mingutsinneqarsimasooq salissinnaanngilaat. Taamaattumik imeqarfiit killeqarfiisa iluini mingutsitsisoqannginnissaata qulakkeerneqarnissaa pingaaruteqartorujussuuvoq. Imileriviit imermik akuiagassamik, soorlu benziinamik uuliamilluunniit mingutsinneqarsimasunik saliisinnaanngorlugit annertusineqassappata, tamanna nunap karsianut aningaasaqarnikkut annertuumik kinguneqartussaavoq. Inatsimmi atuuttumi erngup imigassap sapinngisamik annikinnerpaamik salillugu annertunerpaamik illersorneqarnissaa siunnerfigineqarpoq.

Inussiarnersumik inuulluaqqusillunga



Kim Kielsen